

庶徵典

食貨典第二百十六卷

鹽法部紀事二

宋史孫道夫傳道夫以吏部郎中入對言蜀民鹽額之弊上納其言除太常少卿

金安節傳安節爲大理卿時獲僞造鹽引者大臣欲置之死安節力爭以爲事已十餘年且自首無死法因得減等

隱逸傳胡憲爲福建路安撫使司屬官時帥張宗元權鹽急私販者銖兩亦重坐憲告以爲政大體宗元不悅憲復請祠而去

張致遠傳致遠爲侍御史言聚財養兵皆出民力善理財者宜固邦本請罷權福建鹽精擇三司使副以常平茶鹽合爲一官令計經常量入爲出先務省節次及經理詔戶部講究

張運傳運爲大理少卿請正兩浙鹽法以寬私鬻之禁

文獻通考紹興六年趙鼎奏久不變法建康日納鹽錢甚盛上曰法旣可信自然悠久

宋史顏師魯傳師魯除江東提舉尋改使浙西鹽課歲百鉅萬本錢久不給亭竈私鬻禁不可止刑

辟日繁師魯樽帑緡盡償宿負戒官吏毋侵移比旁路課獨最上謂執政曰儒生能辦事如此予職直祕閣

葉衡傳衡進士第調福州寧德簿攝尉以獲鹽寇改秩知臨安府後除戶部侍郎時鹽課大虧衡奏年來課入不增私販害之也宜自煮鹽之地爲之制司火之起伏稽竈之多寡亭戶本錢以時給之鹽之委積以時收之擇廉能吏察之私販自絕矣仍命措置官三人淮南於通州浙東於明州浙西於秀州

宗室傳不意知開州郡有鹽井舊長吏必遣所親監之私其利不意罷遣鹽利倍入郡計用饒以羨餘代民輸夏秋兩稅及天申節銀絹在開二年民絕鬪爭夜戶不閉諸司交薦以比古循吏轉夔州轉運判官開人數千遮城門不得行至夔民病上供銀時部使者以親故攝大寧鹽場專其利不意斥去而鹽獲羨餘乃出錢市羨鹽數十萬斤易米得三萬餘斛運抵湖北市銀以歸代諸郡納上供銀

李椿傳椿爲吏部郎官論廣西鹽法孝宗是其說遂改法焉

陳俊卿傳俊卿叅知政事減福建鈔鹽罷江西和糴廣西折米鹽錢後以觀文殿大學士帥福州陳峴建議改行鈔鹽法俊卿移書宰執極言福建鹽法與淮浙異遂不果行

葛泌傳泌除著作郎兼學士院權直除正言論征榷歲增之害如輦下都稅務紹興間所趣茶鹽歲以一千三百萬緡爲額乾道六年後增至二千四百萬緡成都府一務初額四萬八千緡今至四十餘萬緡民力重困願明詔有司茶鹽酒稅比原額已增至一倍者毋更立新額官吏不增賞庶少蘇疲氓上特召累遷給事中廣西議更鹽法泌言鈔法之行漕臣嘗給羣商沒入其貲楮幣行之二廣民必疑慮且有後悔除刑部尙書

劉珙傳珙叅知政事奏除福建鈔鹽歲額二萬萬罷江西和糴及廣西折米鹽錢

癸辛雜識楊大芳嘗爲明州高亭鹽場場在海中或天時晴霽時見如匹練橫天其色淡白則晴雨中分土人名之曰短蓬亦蜃氣之類也

宋史范成大傳成大知靜江府廣西窘匱專藉鹽利漕臣盡取之於是屬邑有增價抑配之弊詔復行鈔鹽漕司拘鈔錢均給所部而錢不時至成大入境曰利害有大於此乎奏疏謂能裁抑漕司強

取之數以寬郡縣則科抑可禁上從之數年廣州鹽商上書乞復令客販宰相可其說成大出銀錢助之人多以爲非下有司議卒不易成大說

外戚傳鄭興裔領高州刺史建劍汀邵鹽筴屢更漕臣請易綱運爲鈔法興裔極言其不可

宦者傳甘昇內侍省押班澤之子澤之死昇累遷亦至押班臨安尹胡與可爲小官時丐貸於臨安富民馬氏不如欲銜之至是馬以鬻官鹽踰格繫獄與可諷有司以私鹽論御史陳升卿決獄平反之昇之子婦與可女也乃陰爲與可地譖升卿於帝前謂爲豪民馬請事所得至萬緡上疑遂論罪馬流巖州升卿由是罷去

文公政訓楊通老相見論廣西鹽曰其法不密如立定格六斤不得過百錢不知去海遠處搬擔所費重此乃許子之道但當任其所之隨其所嚮則其價自平天下之事所以可權衡者正謂輕重不同乃今一定其價安得不敝

宋史宗室傳師曷知秀州改淮南運判時郡鐵錢不行鹽商弗至師曷請發度牒出倉粟以收鐵錢鹽利遂通

沈作賓傳作賓知台州訪民疾苦弛鹽禁

宗室傳彥櫛爲廣西提刑諸郡鬻官鹽取息之六以奉漕司後增至八分彥櫛復其舊以蘇民力朝廷從之

辛棄疾傳棄疾知紹興府兼浙東安撫使寧宗召見言鹽法加寶謨閣待制

汪綱傳綱提舉淮東常平淮東煮鹽之利本居天下半歲久弊滋鹽本日侵帑儲空竭貢兩總司五十餘萬亭戶二十八萬借撥於朝廷五十萬又會餉所復鹽鈔舊制弗許商人預供貼鈔錢鹽司坐是窘不能支綱挾撓隱伏凡虛額無實詭爲出內飛走移易事制曲防課乃更羨旣盡償所負又贏金三十萬緡爲椿辦庫以備鹽本之闕添置新竈五十所諸場悉視乾道舊額三百九十萬石通二千三百萬緡

高定子傳定子知夾江縣制置使鄭損強復自用欲增總領所鹽課取舊貸軍費定子辨其顛末損乃釋然曰二司相關處公每明白洞達言之使人爽然自失尋差知長寧軍長寧地接夷獠公家百需皆仰清井鹽利來者往往因以自封殖制置司又權入其半定子至爭於制置使得蠲重賦

趙希館傳希館主管夔州路轉運司帳司疏大盜鹽井利病使者上諸朝民便之改知玉山縣未行召對希館論大盜鹽井本末盜宗嘉納之

柴中行傳中行爲西京轉運使官取鹽鈔贏過重課日增入中日寡鈔日壅中行揭示通衢一錢不增商賈大集

袁甫傳甫以直徽猷閣知建寧府兼福建轉運判官閩鹽隸漕司例運兩綱供費後增至十有二吏卒並緣爲姦且抑州縣變賣公私苦之甫奏復舊例

范應鈴傳應鈴爲軍器監兼尙書左郎官屬鹽法屢變商賈之贏上奪於朝廷之自鬻下奪於都郡之拘留九江豫章扼其襟喉江右貧民終歲食淡商與民俱困矣應鈴力陳四害願用祖宗入粟易鹽之法授直寶謨閣湖南轉運判官

王居安傳居安以敷文閣待制知福州升龍圖閣直學士轉大中大夫提舉崇福宮將行鹽寇起寧化居安以書諭汀守曰土瘠民貧業於鹽可盡禁耶且彼執三首惡以自贖宜治此三人他可勿治鄭清之傳清之拜太傅右丞相兼樞密使諸路虧鹽執其事者破家以償清之覈其犯科者追理呈

誤者悉蠲之全活甚衆

孫子秀傳子秀通判慶元府主管浙東鹽事先是諸場鹽百袋附五袋名五釐鹽未幾提舉官以爲正數民困甚子秀奏蠲之開慶元年爲浙西提舉常平先浙丁大全以私人爲之盡奪亭民鹽本錢充獻羨之數不足則估籍虛攤一路騷動亭民多流亡子秀還前政鹽本錢五千餘萬貫

冷應澂傳應澂知德慶府奏罷抑配鹽法及乞用楮券折銀綱等五事以紓民力

李庭芝傳庭芝主管兩淮制置司事初至揚時揚新遭火廬舍盡燬州賴鹽爲利而亭戶多亡去公私蕭然庭芝悉貸民負逋假錢使爲屋屋成又免其假錢凡一歲官民居皆具鑿河四十里入金沙餘廢場以省車運兼浚他運河放亭戶負鹽二百餘萬亭民無車運之勞又得免所負逋者皆來歸鹽利大興

洪天錫傳天錫知潭州改漳州皆力辭又改福建安撫使力辭不許亭戶買鹽至破家隕身者天錫首罷之民作佛事以報

李芾傳芾知潭州兼湖南安撫使時元右丞阿里海牙旣下江陵分軍戍常德遏諸蠻而以大兵入

潭芾慷慨登陴與諸將分地而守城中苦食無鹽芾取庫中積鹽席焚取鹽給之

谿山餘話嘗記宋時漕運自荆湖南北米至真揚交卸舟人皆市私鹽以歸每得厚利故舟人以船爲家一有損漏旋即補葺久而不壞運道亦通

金史烏古論慶壽傳慶壽爲拱衛直都指揮使上書云汝州襄城縣去汝州遠于許州兩舍請割隸許州便尙書省議汝州南有鴉路舊屯四千其三千在襄城今割襄隸許州道里近便仍食用解鹽其屯軍三千依舊汝州總押從之

循吏傳趙重福爲滄州鹽副使歲饑民煮鹵爲鹽賣以給食鹽官往往杖殺之重福曰寧使課殿不忍殺人歲滿課殿當降尙書右丞完顏匡三司使按出虎知其事乃以歲荒薄其罰

忠義傳從坦宗室子充宣差都提控安撫山西軍民應援中都上書曰絳解二州僅能城守村落之民皆嘗被兵重以連歲不登人多艱食皆恃鹽布易米今大陽等渡乃不許粟麥過河願罷其禁官稅十三則公私皆濟矣又曰絳解河中必爭之地惟令寶昌軍節度使從宜規畫鹽地之利以實二州則民受其利兵可以強矣又曰平陸產銀鐵若以鹽易米募工鍊冶可以廣財用備戎器小民備

力爲食可以息盜

哀宗紀正大七年秋賜陝西死事之孤鹽引及絹仍量材任使

元史史天倪傳天倪子楫爲真定兵馬都總管時朝廷或請運鹽按籍計口給民以食楫爭其不可曰鹽鐵從民貿易何可若差稅例配之議遂寢

月乃合傳月乃合贊卜只兒斷事官事以燕故城爲治所歲己未世祖以親王南征從行至汴令專饋饗運濟南鹽百萬斤以給公私之費所過州郡汴蔡汝潁之間商農安業軍政修舉月乃合與有力焉

崔斌傳斌除同僉樞密院事議戶部給濱棣青滄鹽券付行省募民以米買之仍增價和糴遠近輸販者輻輳餽餉不勞而集

趙炳傳炳爲京兆路總管兼府尹有旨以解州鹽賦給王府經費歲久積逋二十餘萬緡有司追理僅獲三之一民已不堪炳密啟王曰十年之逋責償一日其孰能堪與其裒斂病民孰若惠澤加於民乎王善其言遽命免徵

沙全傳全以功授華亭軍民達魯花赤時民心未定有未附鹽徒聚眾數萬掠華亭全擊破之籍其名得六千人請於行省遣屯田於淮之芍陂行省以邑人新附時有叛側委萬戶忽都忽等體察欲屠其城全言鹽卒多非其土人若屠之枉死者眾以死保其不叛遂止賜金符加武略將軍兼領鹽場職如舊

趙孟頫傳孟頫同知濟南路總管府事時總管闕孟頫獨署府事有元揪兒者役於鹽場不勝艱苦因逃去其父求得他人屍遂誣告同役者殺揪兒既誣服孟頫疑其冤留弗決踰月揪兒歸郡中稱為神明

馬紹傳紹擢拜叅知政事時議增鹽課紹獨力爭山東課不可增事遂寢

謝讓傳讓爲河間等路都轉運鹽司經歷先是竈戶在軍籍者悉除其名以丁多寡爲額輸鹽其後多顧舊戶代爲煮鹽而顧錢甚薄讓言軍戶既落籍爲民當與舊竈戶均役既令代役豈宜復薄其傭使重困乎自今顧人必厚與直乃聽先是逃亾戶率令見戶包納其鹽由是豪強者以計免而貧弱愈困讓令驗物力多寡比次甲乙以均之擢南臺御史後遷河南行省左右司郎中時江淮屯戍

軍二十餘萬親王分鎮揚州皆以兩淮民稅給之不足則漕於湖廣江西是歲會計兩淮僅少三十萬石讓請以淮鹽三十萬引鬻之收其價鈔以給軍食不勞遠運公私便之

敬儼傳儼擢江南諸道行御史臺治書侍御史先是儼以議立尙書省忤宰臣意邇兩淮鹽法久滯乃左遷儼爲轉運使欲以陷之比至首劾場官之貪污者法既大行課復增羨至二十五萬引河南行省叅政來會鹽筴將以羨數爲歲入常額儼以亭戶凋弊已甚以羨爲額民方將殫病人以爲己非宰臣事事遂止

劉正傳正拜平章政事議中書省事時議經理河南淮浙江西民田增茶鹽課額正極言不可弗從張思明傳思明再授兩浙鹽運使歲課充贏僚屬請上增數思明曰贏縮不常萬一以增爲額是我希一己之榮遺百世之害

曹伯啟傳伯啟爲司農丞奉旨至江浙議鹽法罷檢校官置六倉於浙東西設運鹽官輸運有期出納有次船戶倉吏盜賣漏失者有罰歸報著爲令

張昇傳昇除紹興路總管初大德至大間越大饑且疫厲民死者殆半賦稅鹽課責里胥代納吏並

緣爲姦害富家昇爲証於簿籍白行省蠲之

樂郊私語延祐間程文憲條言江南茶鹽等稅近來節次增添比初時十倍今又逐季增添正緣管課程官虛添課額以諂上司其實利則歸己虛額則張掛欠籍

元史王克敬傳克敬爲紹興路總管郡中計口受鹽民困於誅求乃上言乞減鹽五千引運司弗從因歎曰使我爲運使當令越民少蘇矣擢江西道廉訪司副使轉兩浙鹽運司使首減紹興民食鹽五千引温州逮犯私鹽者以一婦人至怒曰豈有逮婦人千百里外與吏卒雜處者污教甚矣自今毋得逮婦人建議著爲令

趙師魯傳師魯爲河間路轉運鹽使除害興利法度修飭絕巡察之奸省州縣廚傳贈遺之費竈戶商人無不便之歲課遂大增

鐵木兒塔識傳鐵木兒塔識拜中書右丞陞平章政事兩浙閩鹽額累增而課愈虧江浙行省請減額鐵木兒塔識奏歲減十三萬引

蘇天爵傳天爵爲兩浙都轉運使時鹽法弊甚天爵拯治有方所辦課爲鈔八十萬錠及期而足

成遵傳遵爲大都河間等處都轉運鹽司初汝汴二郡多富商運司賴之是時汝盜起侵汴境朝廷調兵往討括船運糧以故舟楫不通商販遂絕遵隨事處宜國課皆集

遂魯曾傳魯曾爲禮部郎中至正十二年丞相脫脫討徐州賊以官軍不習水土募瀕海鹽丁爲軍乃超遷魯曾資善大夫淮南宣慰使領征討事遣其募鹽丁五千人從征徐州平繼使領所部軍討淮東

賀仁傑傳仁傑居中事上知無不言言無不聽多所裨益帝欲選民間童女充後宮及有司買物多非其土產山後鹽禁久爲民害皆奏罷之民爲之立祠

烏古孫良楨傳良楨自左曹登政府多所建自罷福建山東食鹽稅民皆德之

貢師泰傳江浙行省丞相達識帖睦迺以便宜授師泰兩浙都轉運鹽使至則剔其積蠹通其利源大課以集國用資之

樂郊私語州瀕海鹽爲國利然亡命得以私販擅之每操兵飛棹往來賈販雖吏兵莫之敢撓至正丁酉灤城范廉卿以蔭補蘆瀝巡檢其爲人恂恂儒者顧長騎射無論鳥獸不及飛竄雖海塗上跳

魚子蟹之細捷射之百不失一夜每懸火竿上去竿三百步從暗中射火無不滅也於是亡命心懼毋敢於州北私販境內爲之肅然先是本路推官陳春以平反鹽獄數百人見稱至是本路大僚曰使官人人如范何必陳司理平反也

元史陳思濟傳思濟同知浙東道宣慰司事時兩淮鹽課不敷授兩淮都轉運使奸弊盡革商賈通行歲課以足

浙江通志龐安洪武中嘉興通判是時鹽政殊嚴安獲鹽徒械送京師而以鹽賞捕獲者戶部以安違例取罪狀安上書曰律者萬世之常例者一時之旨今欲准例而行則與給賞捕之律相違而使陛下失大信於天下也上是其言詔如律

明良記高帝旣制官員月俸仍有食鹽其關支之時駝負者輒委棄於地帝偶見之問之乃刑部人也帝曰此無他以多厭棄耳命刑部食鹽遞減十斤

雲南通志王善宣德中任叅議永寧鹽井土蠻爭地讎殺善爲剖折俱帖服

八閩通志黃敏興化府經歷廉正自持吏不忍欺嘗督造戶口食鹽用驗丁論稅立法有方

廣西通志葉盛以僉都御史巡撫兩廣嘗疏請許鹽商多寡入米餉邊而後出境公私利焉

浙江通志彭韶爲僉都御史巡視浙江時計臣言鹽法沮壞命兼清理釐奸革弊恤竈通商繪煮海貧人曬淋煎負之苦節爲人圖以獻因獲蠲逋負貧竈始蘇

江南通志高明官僉都御史揚州鹽寇大作奉勅往捕并理鹽法明送巨艦率兵勦賊有中官鬻私鹽籍鹽入官劾之陳利害十餘事俱報允

山西通志姜寶擢監察御史巡鹽河東值歲饑撈鹽數百萬引抵入田租

浙江通志何良輔任處州推官兼理鹽務無所屈病篤商人贖以百金時不能言強起書於紙曰不可不可竟却之尋卒

陝西通志馬相任管糧通判築環縣城郭鑿鹽池井得甘泉一方仰賴之

李東陽鹽法對錄弘治十八年四月十七日上召至暖閣臣健等因奏曰今國帑不充府縣無蓄邊儲空乏行價不償正公私俱竭之時鑄錢一事最爲緊要其餘若屯田茶馬皆理財之事不可不講也臣東陽因奏曰鹽法尤重今已壞盡各邊開中徒有其名商人無利皆不肯上納矣上問商人何

故不肯上納臣健等因極論奏討之弊上曰奏討亦只是幾家臣東陽奏曰奏討之中有夾帶奏一分則夾帶十分商人無利正坐此等弊耳上曰夾帶之弊亦誠有之臣健等又言王府奏討亦壞鹽法每府祿米自有萬石又奏討莊田稅課朝廷每念親親輒從所請常額有限不可不節上曰王府所奏近多不與皆對曰誠如聖諭但乞今後更不輕與則不敢奏矣臣健因奏曰臣聞國初茶馬法初行有歐陽駙馬者販私茶數百斤太祖皇帝曰我纔行一法乃首壞之遂寘極典高皇后亦不敢勸此等故事人皆不敢言上曰非不敢言乃不肯言耳因言鹽法須整理臣遷等贊曰請下戶部查議上曰然明日降旨云祖宗設立鹽法以濟緊急邊儲係國家要務近來廢弛殆盡商賈不行各邊開中雖多全無實用戶部通查舊制及今各項弊端明白計議停當來說於是中外稱慶知上意勵精思治如此

陝西通志朱裳沙河人進士以巡鹽山西錢寧差官市鹽拒不與有偉人奏討鹽引司空石某曰爾徒往無益朱御史定不允也

閩書張拱辰正德十二年進士戶部郎監太倉成化以來鹽法改折先所給行有數世候支者黠商